

南洋

夏思痛 著

上海泰东图书局印行

南洋

上海泰東圖書局

民國四年九月十日出版

(南洋)

定價大洋壹元

著述者 思 痛

發行者 泰東圖書局

上海福州路一百十九號

印刷者 泰東圖書局



總發行所

泰東圖書局

上海福州路一百十九號

序

吾友思痛於甲寅乙卯之間游歷南洋各島歸而出示所著南洋三卷霖城潛叟受而讀之旣因太息言曰吾今而知專制國之人民僅足爲人之奴隸牛馬而不可有爲也專制國之君主適足爲人所囚虜慘辱而莫能自脫也彼其專制之初務愚黔首必使一國之人漸摩積威之下渾噩膏昧無國家之觀念無政治之思想以言獨立則教育缺乏以定合羣則智能短淺徒仰望其皇王后辟日安於耕鑿作息之天而後在上者得以食租衣稅保其尊嚴卽或貪暴驕橫侈然自恣亦足以震

懾蚩氓而莫之敢抗此所謂一人政治其弊害實有不
可勝言者專制之久且極莫若吾華暴秦以後人民視
君上如帝天君上視人民如草芥平時則侈其侯甸要
荒以爲薄海懷柔威及四宇遇人民之顛連困苦雖在
郭郭之內猶且以堂高廉遠熟視無覩矧在禹迹九州
之外誰復降高紆尊爲之謀保護之策樹獨立之基哉
吾觀前清乾隆五年南洋華僑與荷蘭爭人頭稅久而
未決迨荷人訴於清政府乃以海外叛亂清廷不復預
聞答之遂爲荷蘭虐殺數萬人益足見專制國之人民
曾草芥之不若而狃於專制無自立之能力一意依賴

政府者其弊害尤不可勝言也當南洋甫闢之時如明之鄭和梁道明清之吳元盛葉來者曷嘗不拓土數萬方里擁衆數百萬人似亦可植邦國長子孫王此大邦而莫我侵害也乃一遇荷蘭則東印度各地失再遇英吉利則馬來半島亡向使明清執政者流知海外僑民之內嚮不可恃專制以遙制之也克盡保護之責任提倡獨立之精神則南洋各島何不卒爲吾華之領地又使鄭梁吳葉等輩知僑屬諸地之保守不可習專制以壓服之也而稍布共和之政體教以自治之全能則南洋諸僑何不可爲建國之傑士乎是知割據之始奮一

人之勇知以指揮部衆亦足借以成功降及後世聚蠢
愚無知之人佐庸懦無識之主偶遇敵國外患則望風
而靡且以爲此國土者但爲某氏世享之利於我輩固
無預也甚或苦其暴虐有及汝偕亡之痛是時雖自悔
其專制之失舉所有以公之國人而人亦漠然無所動
於中彼其尊君親上之心非昔隆而今替也蓋以夙昔
無國家之觀念也無政治之思想也無教育使之獨立
也無知能可以合羣也此時始悔專制之失亦已晚矣
雖然國之存亡亦不能獨咎政府也南洋華僑率其依
賴政府之性不自振拔卒底於亡而莫救向使其中有

豪傑者出脫離專制革除弊政合羣獨立以漸自治未必不足以圖存乃聽英荷出其籠絡強制之手段以逐其故主各僑民反深感其保護之恩但期自免相率馴服無敢枝梧曾不計亡國之後受異種之壓制其痛苦爲何如者亦大可哀也已嗚呼我同胞慎勿謂夙受壓制雖同種當國而我固無何等之幸福縱令國亡以後他日異種政府之待我與今日同種政府之待我將毋同也則借南洋以爲殷鑒吾同胞毋怵惕於專制淫威而速籌救亡之計乎吾政府毋堅持其專制政策而或改謀國之道乎思痛志願宏大情思激昂擴世界之觀

念痛國勢之阽危本其聞見箸爲此書於各島酋王之
昏庸而懦兇悍而愚及僑民土人之無知無識勤勞屈
伏於下以致爲英荷所乘於其興亡盛衰之由三致意
焉有心國是者可以觀矣民國四年九月潛叟序於滬
上辟廬

自序


中華民國之成立已整整三年有餘矣而紛擾錯亂有逾曩昔不獲已避地南洋歷遊英領荷領各島接於日者猶吾同胞之居處也入於耳者猶吾同胞之語言也適於口者猶吾同胞之烹飪也火船汽車風馳電掣未及兩月周覽萬里幾不知身之遠適異國也快何如之溯自吾先民之懋遷來此當遠在漢唐以上宋明之季以胡人入主中夏之故乃更大盛而義夫烈士之避亂而至者尤有所聞泰西人動以探險闢地貿易殖民傲睨寰球而不知吾華人實有過之無不及也惟是政府目光如豆不獨不知提倡并不予以保護以致徒爲異族之奴隸徒爲異族之牛馬可哀也已試觀今之坐享錦繡山河坐擁膏腴土壤者果誰血汗所漬耶高視闊步凌駕亞州者果誰手足之烈耶我政府能無汗顏否滿清末造吾同胞

受外界激刺往往顧念祖國而政府之不提倡不保護如故也乃轉出其不甚愛惜之翎頂徽章以欺騙其不曾讀書識字之大資本家至今爲梗稍不遂遂不惜指南洋爲亂黨生產地雖然亂黨亦難言之矣黨於官者之謂予言曰民黨亂黨也反抗政府破壞大局亂不底於亡國不止也予曰唯唯黨於民者之謂予言曰官黨亂黨也更變國體喪失主權賊害賢良割棄疆土改竄約法搜括民財騷擾閭閻斷送路礦草菅人命停止學堂統一三權援引革小規復帝制蹂躪民權顛倒是非獎勵貪暴誘買暗殺撤回學生創設酷刑提倡迷信軍隊腐野吏治廢弛賄賂公行嫖賭相競亂不底於亡國不止也予亦曰唯唯嗟乎無論何者爲亂黨何者爲非亂黨而要莫非吾同胞也總之中國興亦必大流吾同胞之血而後能興中國亡亦必大流吾同胞之血而後可亡事有必至理有固然予惟與各島同胞北望中華同聲一哭而已然反觀吾海外同胞而可爲痛哭者又

烏能已一居留之久也閱千數百年矣一聚集之多也當幾百萬衆矣而於此間之政治風俗地理民情商務土產從無片紙隻字之記載以餉我國內同胞抑何陋也不識不知順帝之則猶然我上古混沌之人其何能自立於生存競爭之世耶而況以詞意不能通達之故嚴分畛域省與省分府與府分縣與縣分等同鄉於敵國視同種於塗人此何俟他人之魚肉我我已先自支解而碎割之悲哉今夫天下事非不可爲也聯絡自治之團體以固其心集合同意之公司以厚其力何嘗不可與白人馳騁於商場之上而奪其標白人慣以一公司之力墟人家國闢地動千萬方里而支配其百兆以上之人民豈天之生是使獨哉東海島人實吾後起者也乃亦聯翩畢集實逼處此以與我爭此土地吾同胞其知之否予茲搜集其道聽而塗說者將以爲吾海內外同胞之先導焉嗚呼自救不暇而顧他圖吾其爲愚公乎中華民國四年三月一日思痛序於星洲寄廬

自

序



四

例言

一此書所採輯或得諸老商家之口談或見之有心人之筆記或輾轉諮詢而集或採訪報告而來雖不敢謂詳盡無遺亦不致以荒謬見笑

一書中詳述英人荷人種種手段種種政策以及爪哇各島土酋之強悍而愚終歸降服馬來半島蘇丹之昏庸而懦弱尙享尊榮俾知今日東西洋人對我中國無不如法炮製而中國人民可借土酋爲鑒矣而中國政府可以蘇丹自豪矣

一南洋爲黃金之秘庫可白手而起家當夫草昧初開之時吾華僑之掌數千萬數百萬資本者實繁有徒其所以不能稱主人翁於南洋者固由政府之不與以提倡保護實亦由於團體散漫獨力撐持故偶蹶卽不起歐人之能執霸權於商界中國由政府之竭力提倡保護何嘗不

由於通力合作設立公司所謂多財善賈是也俾人知華商失敗之原
因無合羣力亦無公益心也

一南洋實業方興未艾我中國在在多無業游民與其藉當兵當勇僅圖
朝夕之一飽胡不出洋自食其力尙有發財之希望而況乎此後兵勇
之將廢去南人耶故不惜詳細言之藉以啓發吾同胞遠大之志氣
一本書所紀雖外國事實皆與吾同胞有密切之關係故書中紀事必以
中歷爲主以便閱者易於省悟亦藉令人刻刻無自忘爲中國人也
一南洋地名有英語荷語倭語土語閩語粵語之種種清濁高下錯出雜
陳本無一定茲概取中國人普通之稱謂爲據字音之外錯在所不免
閱者諒之

一書中對於政府無諛詞非苛也愛之也蓋愛之極者不覺期之切期之
切者不覺責之嚴閱者幸勿以爲有心督過政府大凡人情不受激刺

不足以發憤爲雄無他意也



